



Co respaldo da Consellería de Política Social, a organización humanitaria e a operadora galega percorren localidades das 4 provincias para ofrecer os seus “menús tecnolóxicos”

Cruz Vermella e R chegan a Cedeira con “Enredando *tour R*” para integrar persoas maiores na contorna dixital

- ***Na praza Roxa de Cedeira instalárase este venres 17 a aula móbil do programa para “enredar” a persoas maiores no mundo dixital dunha maneira lúdica, ofrecéndolles a degustación dun “menú tecnolóxico” á súa medida***
- ***“Enredando *tour R*”, que se presentou na Coruña este luns, continúa agora o seu periplo en Cedeira e ata o mes de outubro farao noutras localidades de Lugo, Ourense e Pontevedra***

Mércores, 15 de setembro de 2021.- Tras a súa presentación e o desenvolvemento das primeiras actividades o pasado luns na Coruña, a aula móbil formativa con contidos tecnolóxicos de “Enredando *tour R*” recalará este venres 17 na praza Roxa de Cedeira onde se impartirán contidos didácticos para favorecer a ‘inclusión dixital’ das persoas maiores.

Que a fenda non deixe ningúen atrás

A intención primeira desta acción é minorar o efecto da fenda dixital que tanto lle afecta a unha gran porcentaxe das/dos maiores e a outros colectivos vulnerables. Falamos de persoas que, por exemplo, durante o confinamento e nos momentos máis duros da pandemia, non puideron botar man das novas tecnoloxías para completar xestións esenciais como pedir unha cita médica, facer a compra ou realizar unha operación bancaria sen saír da casa.

R e Cruz Vermella teñen claro que o máis importante é que as persoas maiores lles perdan o medo ás novas tecnoloxías e desenvolvan habilidades básicas para avanzar e aprender a navegar por internet, ter unha conta de correo ou enviar unha mensaxe.

E, sobre todo, que non se sintan sós/soas e vexan que persoal especializado e voluntarios/as de Cruz Vermella lles darán o apoio dixital que precisen *in situ*, no espazo das formacións, e que poden recibir asesoramento tamén a través da páxina enredando.gal, creada especificamente para completar esta acción didáctica dedicada a elas e eles.

Menús formativos (para todos os gustos)

O programa desenvólvese nunha aula móbil con contidos formativos vinculados ás novas tecnoloxías. Unha furgoneta superequipada transporta os *smartphones*, portátiles, tabletas, altofalantes intelixentes... e todo tipo de accesorios para facilitar ese achegamento á realidade da tecnoloxía máis doméstica e presente en multitude de áreas da nosa vida cotiá.

As persoas que participen poderán enredar mentres ‘degustan’ un dos catro “menús formativos” que Cruz Vermella e R lles prepararon para que elixan o que máis se adapte ás súas necesidades e preparación. En función deses menús, organizaranse na praza Roxa de Cedeira este venres 17, en horario de 10:00 h a 14:00 h, 8 obradoiros (2 por menú) de 45 minutos cada un. Al ser no espazo exterior instalaranse uns toldos para o desenvolvemento da actividade e cumpriranse escurpulosamente as esixencias sanitarias e medidas anti COVID-19 para garantir a seguridade de todo o mundo e en todo momento.

Esta é a carta de “Enredando Tour R”, cos seus 4 menús:

_**“Vivo no mundo analóxico, rapaza”**; menú básico para comezar a “enredar” en internet

_**“E ti... de quen vés sendo?”**: para saber que é e como funciona o Whatsapp.

_**“Dixitalízate, ho”**: para aprender como se pode acceder ao SERGAS, ao banco, facer a compra e, en xeral, como xestionar o máis cotián por internet.

_**“Menú R: móbilR”**: para coñecer a factura electrónica e outras utilidades e aplicacións prácticas en internet.

Dende A Coruña e Cedeira ata A Guarda

Tras o seu paso pola Coruña o luns e este venres por Cedeira, a aula móbil percorrerá ata o 6 de outubro 9 localidades máis das outras tres provincias galegas. Serán Viveiro, Sarria e Monforte de Lemos, en Lugo; O Carballiño, Verín e O Barco de Valdeorras, en Ourense; e Lalín, Ponteareas e A Guarda, en Pontevedra.

Para participar nas actividades de “Enredando *tour R*” as persoas interesadas poden chamar ao teléfono gratuíto 900 825 030 ou escribir un correo electrónico a galicia@cruzroja.es.

Sobre “Enredando”, de Cruz Vermella Galicia

“Enredando *tour R*” enmárcase dentro do proxecto “**Enredando**” de Cruz Vermella Galicia, cuxo obxectivo xeral é reducir a fenda dixital entre a poboación que atende a Organización na nosa comunidade autónoma. Trátase dun proxecto de capacitación dixital que xorde para evitar procesos de exclusión social por motivos económicos, de xénero, de idade, nivel educativo ou zona de residencia, entre outros. “Enredando *tour R*” é a primeira das grandes accións deste proxecto que se pon en marcha e que aposta por apoiar as persoas maiores e sensibilizalas no uso das tecnoloxías, así como axudalas a derrubar os temores e inseguridades que poidan ter ao seu respecto.

comunicación Cruz Vermella

687 419 397

lofreco@cruzroja.es

www.cruzvermella.gal

comunicación R

prensa@mundo-r.net

R.gal